



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 7

Arunachal CM Khandu  
anema FIR benok

Emergency mapang tammang  
anogotem kodanga mamatsü



VOL. XVIII NO. 252 (ADOK 252) DIMAPUR

KÜPTOKNÜ (SATURDAY)

AAMI (JUNE) 26, 2021

₹ 5.00

## India nung nisung 52 dak Delta Plus Variant puteta lir

**New Delhi, June 25, 2021 (Agencies):** India nung nisung 52 dak SARS-COV-2 indang Delta Plus variant puteta lir aser linük nung COVID-19 wara tanabuba ano metembang lir ta Hokolbarnü Union Health Ministry-i metetdaksüogo.

State 8 nung Delta Plus variant puteter 50% lir aser ano sample 50,000 tema dak iba variant aliba bushidar, ta parnokki ashi.

Linük nung coronavirus putetba 88% ajemogo aser taneptsü angur 96.7% kümogo, ta Union health ministry-isa metetdaksü.

"Andhra Pradesh, Delhi, Haryana, Kerala, Maharashtra, Punjab, Telangana aser West Bengal nung Delta variant puteter 50% lir" ta National Centre for Disease Control (NCDC) Director, Dr SK Singh-isa ashi.

Külen, Indian Council for Medical Research Director-General, Dr Balram Bhargava-isa "Covidshield aser Covaxin ajanga SARS CoV 2 - alpha, beta, gamma den delta variants anema rarater" ta metetdaksü.

"Centre-i tanur bena aliba tetsütem nem vaccine agütsüsü molunga agizükogo. Tang

atemabo mamatzü jemdaksüba tetsütem nem dang Covid vaccine agütsür" ta Dr Bhargava-isa ashi.

"Onoki tanur arishi küm 2 nungi 18 tsüngda alir nem vaccine agütsüsü atema study ka tenzükogo aser September ita tashi ka nung iba osang metettsü. Ajisüaka, alima tanur nem vaccine agütsüsü atema o atsütepa jembir aser United States nung timtem kar adokba asenoki nguogo. Anungji, iba indang osang tejangja ka mangu tashi tanur nem vaccine magütsüsü" ta paisa metetdaksü.

## COVID-19 Nagaland: Nisung 22,000 tema taneptsü nguogo

**Kohima, June 24, 2021 (TYO):** Nagaland nung Hokolbarnü COVID-19 puteta lir nisung 127 taneptsüba anguba züngsema nisung 22,000 adenogo aser külen nisung 130 dak puteta nisung ajak agi 24,759 kümogo.

"Tanü nisung 130 dak putet. Parnokki Mon nung 37, Dimapur nung 31, Peren nung 20, Mokochung nung 13, Kohima nung 11, Zunheboto nung 8, Wokha nung 6, Phek nung 2 aser Kiphire o Longleng nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-isa ashi.

"Maneni, tanü COVID-19 puteta alir nisung 127 taneptsü angu. Parnokki Mokochung nung 78, Dimapur nung 31, Mon nung 7, Kohima o Longleng nung pezüzü (4), Zunheboto nung 2 aser Phek nung 1 lir. Parnok züngsema taneptsü angur ajak agi nisung 22,072 kümogo" ta paisa metetdaksü.

Anogo 20 lir külen tanü ang COVID-19 nungi taneptsü angur dang nungi puteter teimba liasü aser taneptsü angurji 89.15% lir. Tang COVID-19 puteta alir nisung 1,508 anepaludar, ta Dr

Kikon-isa ashi. Hokolbarnü Kohima nung COVID-19 puteta alir nisung 2 asüba züngsema tasür ajak agi 481 kümogo saka nisung 14 bo tanga tashidak ajanga asü, ta paisa shisem.

"Nagaland nung COVID-19 alitsü akok ta temolung melemi bilemba sample 2,20,061 tendangogo. RT-PCR ajanga 96,487, TrueNat ajanga 60,799 aser Rapid Antigen Test ajanga 62,775 tendang" ta Dr Kikon-isa metetdaksü.

"Brihostibar tashi nung nisung 3,91,728 nem COVID-19 vaccine indang dose 4,48,621 agütsüogo" ta State Immunization Officer, Dr Ritu Thurr-isa ashi.

Vaccine agirtemji frontline workers 60,021, healthcare workers 15,781, arishi küm 45 ser temapur 1,43,835 aser arishi küm 18 nungi 44 tsüngda alir 1,72,091 lir, ta pai ashi.

"Vaccine agirtem rongnungi nisung 56,893-i dose anaprong agiogo. Parnokki frontline workers 28,667, healthcare workers 10,418, arishi küm 45 ser temapur 17,798 aser arishi küm 18 nungi 44 tsüngda alir 10 lir" ta Dr Thurr-isa ashi.

## Centre-i Northeast nem ventilators shitak magütsür: Gaurav Gogoi

**New Delhi, June 25, 2021 (Agencies):** Centre-i Northeast state tem nem ventilator shitak magütsüba atema Congress MP Gaurav Gogoi-isa adokogo.

"Northeast state tem nem ventilator lemzüksüba nung tim mesüi inyaker aser iba tekarak nung metongshitsüla. Northeast state tem nung nisung aika dak COVID-19 puteter anungji nungdakattem peria agütsüsüla" ta Gogoi-isa Union Health Minister Dr. Harsh Vardhan dangi shidi ka zülü.

June 22, 2021 tashi nung state

shia nem ventilator agütsüba osang nung ajemdaker Gogoi-isa iba shidi zülü.

June 23 tashi nung Assam nung nisung 32,000 tema dak COVID-19 putet aser ventilators 1000 lemzüksü. Ajisüaka, Uttar Pradesh nung 4000 shi dak putet saka ventilators 6,316 lemzüksü aser ibaji linük nung timtiba liasü. Iba sülen tanabuba nung Gujarat nem ventilators 6,200 agütsü, ta Tarun Gogoi-isa ashi.

Bihar aser Jharkhand den medemdangra Manipur, Meghalaya aser Mizoram nung

nisung teimba dak putet saka ventilators shitak magütsü, ta paisa ashi.

State aika nung ventilators agütsüba aser amenokba tepila lir. Uttar Pradesh nung ventilators 1067 tashi ano mamenok lir, ta Gogoi-isa metetdaksü.

"Assam nem ventilators 5000 aser Manipur, Meghalaya, Mizoram, Tripura, Arunachal Pradesh o Nagaland state shia nem ventilators 500 agütsüsü mepishir" ta Gogoi-isa Union Health Minister dang shidi nung ashi.

## 1918 nungi Naga yimten tebilemstü asoshi inyaksü tenzük: WC, NNPGs

**Dimapur, June 25, 2021 (TYO):** World War I mapang Nagaland nung kin balala nungi nisung 2000 tashi Europe tashi Allies yariteptsü atema ao aser küm ka lir külen parnokki Naga linük tangatetba nung 1918 nung Naga Club tenteta liasü. Iba ajanga 1929 nung British Statutory Commission nem memorandum agütsü, ta Working Committee, Naga National Political Groups (WC, NNPGs-i metetdaksüogo.

Ajisüaka, August 3, 2015 indang Framework Agreement nung Indo-Naga yimten tebilemstü ya küm 60 shi ka ta shia lir aser iba ajanga Naga yimten atema inyakba aruba küm 40 nembangsür, ta WC, NNPGs sangdong ka nung ashi.

Iba aibelen atema NSCN-IM dak tai metongloksütsü kechiyong iba ya parnok sasep nung telok kati inyakba liasü.

Naga yimten tebilemstü atema Manipuri Naga nungeri shilem agütsü tenzükbaaji 1955 küm parnok kar adenba liasü. WWI mapang Manipuri Naga nunger aika Manipuri Labour Corps nung aden aser parnok kidangi arudang bronze MLC medals bener aru. Parnok ya Naga Club nunga züngsema maliasü, Simon Commission nunga sign asüdak maden aser August 14, 1947 sentong nunga shilem magi.

"Ajakji yutsür, parnokki 1951 plebiscite nunga maden aser iba jagi parnok atema Naga yimten tebilemstü atema inyaka aruba ya küm 60 shi mesüra tajemba ta züngshir (1955 nungi FA 2015). Nagaland nung aliba kintemibo 1918 nungi Naga yimten tebilemstü atema inyaksü tenzük saka NSCN IM nung telemtetba agirtemi parnok tebutemi shilem magiba putiotsü ajak agientsü meranger. Framework

Agreement kulikaket nung lendong keta lir aser putiotsü shitak masü, ajisüaka Naga putiotsü ya kulikaket ka nung dang zülua mali mesüra nisung telok kati dang bena mali" ta WC, NNPGs-i metetdaksü.

British nungeri tashiyim agi Naga nung dang tax agütsü tenzük aser tanü-a Naga telok kati parnokki Naga nunger madak tax agütsü ta sangdonger. India sorkari tax atema sangdong agütsüba atema parnokki telanzüba agütsüdang Naga nunger dang maneni tax agütsü ta shiogo aser iba ajanga parnok dak Nagaland raksatsütsü tangatetba aliba sayur, ta parnokisa ashi.

1946 küm NNC tentetba sülen kilen shiai Naga movement atema pei molung tenlatsü tenzük. 1951 plebiscite ajanga Naga nunger ajaki pei pei telongtet nung putiotsü

temetentem meteta alitsü sangoktsü. 1951 plebiscite ya kin aser yimtsüngtemi pei pei molungba tenlatsü asoshi tenanzüktepagiba ka liasü, ta WC, NNPGs sangdong nung shia lir.

Asenoki aginüaka India sorkari Naga nunger aliba tesem ajak ka akümtsü memolunger aser iba ya February 29, 2012 nü Th. Muivah-i Agri Expo, Grounds Dimapur nung shiogo. Pai iba sentong nung adenba Naga nunger 50,000 dang tiyazü ashi asü mesüra ochi ashi'ar iba osang sangoktsü, ta parnokisa ashi.

Külen, India sorkar aser WC, NNPGs tsüngda yimten latetba sülen Naga nunger lokteptsüba ken o maneni jembitsü molungtepogo aser iba atema NNPG shiai Nagaland state adener taxation policy malitsü lemtetogo. "Agreed Position" ya 1951 plebiscite nangzükshiba

asertatsülangba dang lir, ta WC, NNPGs-isa metetdaksü.

NNPGs tenet tashi Working Committee (WC) ta külemi ajuruteptsü atema Nagaland nung kintem, NGBF, FNR, NTC, CNTC, NBCC, Naga civil societies aser shisashirtemi yaritepa liasü. India sorkar den olemtep tembangogo aser November 17, 2017 nung sign asüba Agreed Position nung ajemdaker status paper ka adokogo aser Naga kin o civil society ajak den osang lemsatepogo, ta parnokisa ashi.

"Naga yimten tebilemstü atema kibur kümürtemi Nagaland nung aliba kintem dang putiotsü sayutsü memerangtsü atema ashir. Nenok mesüra nenok tebutemi shilem magiba putiotsü indang mejembitsüla kechiyong nenok dak iba temeten mesüra tashi mali.

(Maneni tapak 10 nung...)

### Covid putetaka meshirangertem pei kidang takdang balaka nung mongdaksür, idangji -

Pei alidak aser ayipdak mopong aitsüsa kichiba (window & ventilation) lapoka yuang. Akok tashi süngjanglijang aser süngolemba agi tua chiyongtsü tajung chiang aser tzü aser juice jemang. Pei meyong mobile phone, kumesü aser toothbrush nunger ama melentepa tamshi. Mozü achitsü agüja lira, aji shitak chiang. Tango junga mesashitetba, teku ashiba, aketba aser temang metaba timtem lira yakta doctor bushiang.



Tir Yimiyim

## Longleng nung COVID-19 mozü agütsüba sentong ali



Longleng Medical department ajanga District Task Force, Longleng den lungjemer June 24, 2021 nü Public Ground, Longleng nung COVID-19 mozü agütsüba sentong ka ayongzüka liasü.

**Dimapur, Aami/June 25 (TYO):** Dokan kibur, teyariteper, driver, khubener (coolie) aser parnok kinungertem nem COVID-19 mozü agütsüba sentong ka Longleng Medical department ajanga District Task Force, Longleng den lungjemer June 24, 2021 nü Public Ground, Longleng nung ayongzüka liasü.

Iba sentong tenzükba mapang Deputy Commissioner aser Chairman, District Task Force on COVID-19, Longleng, M. Shayung Phom-i medical department dang district nung iba ama sentong ayongzüka atema pelaba lemsatep aser ibai nendaka inyakba mapa ka lir, ta medical tema nem tenüngsang agüja liasü.

Pai medical team dang district nung maneni iba ama

sentong ya ayongzüka agütsü ajungshia liasü. Deputy Commissioner-isa Medical department dang COVID-19 dak sendakba nung awareness agütsüba aser mozü agütsüba osangtem bendentsü aser Longleng district kübok nüburtem nem osang tekeratiba nung social media ajanga prokshitsü mepishia liasü.

Medical team-i district nung mapa tajung inyakba atema Phom-i tenüngsang agütsü aser nüngdakba mapang administration ajanga yaritsü, ta ashi.

SP Longleng, Yanithung-i nüburtem dang COVID-19 dak sendakba olulu aser tetsübu nungi pila alitsü ajungshi aser mozü agütsüba yagi virus prokshiba anendaktsütsü, ta ashi.

Paisa nübur ajakdang, aser

talisa dokan kibur aser gari anirtem dang kati ka ajungshitepa mozü agütsü ayongzüka, kechiaser parnoki anogoshi nisung balala ajurur.

Tang tashi mozü magi alirtem, talisa dokan kibur, teyariteper, driver, khu abener aser parnok kibongtem asoshi iba sentong ya ayongzüka, ya CMO, Longleng, Dr. Obangjungla ajanga ashi.

Tang tashi mozü magi alirtem dang tekeratiba nung iba maongka agütsü lai ayongzüka liasü.

Iba sentong tenzükba DIO Longleng, Dr. S. Imnameren ajanga tayongzüka o jembia liasü. Maneni Chamber of Commerce Longleng aser Drivers Union nungi tiria jembia liasü. Iba sentong nung nisung 327 nem COVID-19 mozü agütsüba liasü.

## Temesepba miim mozü amshiba atema süngsü tulu lir

**Dimapur, Aami/June 25 (TYO):** Alima ajunga nung June 26, 2021 nü "International Day Against Drug Abuse And Illicit Trafficking" amungba nungtem nung UNDCP aser NCB kübok Nagaland State Excise ajanga nüburtem dang ozüng alema temesepba miim mozü amshiba ajanga timtem ajurutsütem metetdakja liasü.

1. Yimya mashi nung ozüng alema temesepba miim mozü amshiba, ayokba, bena aliba, belenba, dangalen bener oa ayokba/amshiba, India telungzüka nung ayokba/amshiba nokdang aser itemji inyakba atema NDPS Act 1985 kübok küm 10 nungi 20 tashi tepuokdak ayutsü aser senchi sen lakh ka nungi ana tashi achitsü mesüra temerenshi anaprong alitsü.

2. Ki-o-jen, Warehouse, Godwon, gari mesüra iba amala amshidaktsüba putetra NDPS Act kübok State ajanga item ki-o-jen soita ayutsü aser

tepuokdak küm 10 nungi 20 tashi ayutsü aser senchi sen lakh ka nungi lakh ana tashi achitsü mesüra temerenshi anaprong alitsü.

3. Osettsüset balala amshia temesepba miim mozü miimbanga ayuba atema State ajanga item oset soita ayutsü aser tepuokdak küm 10 nungi 20 tashi ayutsü aser senchi sen lakh ka nungi lakh ana tashi achitsü mesüra temerenshi anaprong alitsü.

4. India mesüra bendanglen aiben aibelener nem tasüba temerenshia agütsütsü NDPS Act'85 nung shia lir.

5. Temesepba miim mozü ajanga bendenba ki-o-jen, rongsen arakzütüsü akokba mesüra makokba, Bank Accounts/Bank balance tem apuani, kinunger/zütepa alir, medemer temi amshiba NDPS Act kübok State ajanga soita ayutsü aser Bank Account/Bank Balance tem "FREEZED" asütsü.

State nung temesepba miim mozü amshiba ajemdaktsütsü ya Nagaland State Excise department mapa lir, anungji state nung akokba tashi amshia ozüng alema temesepba miim mozü shibelenba kanga sashia mita anüker.

Iba anogomung nungtem nung Nagaland State Excise department ajanga state nung aliba nüburtem, lokti tentet, iba ama tesendaktep wadang nung inyakba NGO tem dang asenok nungi iba temesepba miim mozü tebilemtsü samadaktsütsü asoshi akhang-akhanga nokdaktsü ajungshir, kecha yimya nunga temesepba miim mozü shibelenba/ayoker miimbanga mayutsü ayongzüker, ta Commissioner of Excise & Prohibition, Dimapur, Hotolu Swu-i ashi.

Na aliba tesem nung NDPS Act kübok iba ama aibelen mapa inyakba mesüra inyaktsü aliba metetra, tekeratiba nung Excise department nem osang agüjang, ta paisa ayongzüka liasü.

## State nung National Statistics Day amungtsü

**Dimapur, Aami/June 25 (TYO):** Linük ajunga den külemi Directorate of Economics & Statistics, Government of Nagaland ajanga June 29, 2021 nü National Statistics Day amungtsü, ta sangdong ka ajanga ashi.

Iba anogomung ya "End Hunger, achieve food security and improved nutrition and promote sustainable agriculture" omen nung ajemdaker amungtsü.

National Statistics Day 2021 anogomung nung Ministry of Statistics & Programme Implementation, Government of India ajanga video conference sentong ka ayongzüka lir. Iba sentong nung o jembirtem yamai alitsü: Rao Inderjet Singh, Minister of

State(IC) Ministry of Statistics and Programme Implementation, Government of India; Dr. G P Samanta, Chief Statistician of India & Secretary, Ministry of Statistics & Programme Implementation, Government of India; Pietro Gennari, Chief Statistician, Food and Agriculture Organization of the United Nations, Rome, Italy; Renata Lok-Dessallien, UN Resident Coordinator, India; Prof. Bimal Kumar Roy, Chairman, National Statistical Commission, Government of India; Dr. Sanghamitra Bandyopadhyay, Director, Indian Statistical Institute.

Iba sentong nung Director General, Ministry of Statistics & Programme Implementation, Government of India, Dr. Shailja Sharma menden alitsü.

## SDG Innovation Participatory Action Research Initiative indang result metetdaksü

**Dimapur, Aami/June 25 (TYO):** SDG Coordination Centre, Planning & Coordination Department, Government of Nagaland ajanga February 18 nungi March 14, 2021 tashi ayongzüka 'SDG Innovation Participatory Action Research Initiative' indang result Additional Development Commissioner, Planning & Coordination Department, Nosazol Charles ajanga sangdongogo.

Iba sentong nung mezüng jenjang SusDesi of Living for Environment, tanabuba jenjang Pilot Operation of a Waste-to-Protein Treatment Facility aser tasembuba jenjang Inculcate Sustainable Consciousness ajanga ngutet.

Tensa agi melaba mapang shimteta aliba project tem mapa kuma inyaktsü atema takok angur nem email aser telephone ajanga metetdaksütsü, ta sangdong ka ajanga ashi.

## Kohima village nung COVID-19 vaccination sentong agi



PHC Kohima village nung June 25, 2021 nü COVID-19 mozü agütsüba sentong ka agidang teintet rogo ka mozü agütsüba noksa nung angur.

**Dimapur, Aami/June 25 (TYO):** Kohima Village Task Force on COVID-19 aser MO Kohima Village PHC lungjemer Kohima village kübok aliba Khel pezü aser colony tem nung alir nem COVID-19 mozü agütsüba sentong June 14-18,

2021 aser June 25, 2021 nü ayongzüka liasü.

Iba sentong nung arishi küm 18 nungi 44 tsüngta alirtem, arishi küm 45 nungi tema aser arishi küm 60 tema alir nisung 2,754 nem mozü agütsüba sentong June 14-18, sangdong ka ajanga ashi.

## Mulungnen O



ASO - 17.12.1932

ASU - 02.06.2021

"tanaben shia aruba aser taküm ni: shibai kü dak amangdir, pa süaka, taküm alitsü: aser shibaisa taküm lidir aser kü dak amangdir kodanga masütsü, Nai ya amanger asü?" Yohan 11: 25-26

Ozü temiemtila ojala **Mrs. Benny Alemba** iba lima toktsür teti tatembang makaba limai aoba anogo onok mangyim tejashi nung alidang Arogo, kiyonger, lokti balala, medemertem shirnokisa sarasadem rongsen agi yaritepogo nenok ajak dang kanga pelaba lemsateper.

Ajak dangi tsüngdong aruaki tepela meshitetba atema sasa bilemer saka Tsüngremi nenok ajak moajang.

Temeim Chirnuer, Anükapang, Semchirtem aser Kinungertem



Guwahati nung mang rongdokba tesem ka nung tanü health worker tem anisüngzükba angur. Assam sorkari COVID-19 azüoktsü atema state kübok district 15 nung COVID-19 hotspots 220 ajitetogo aser iba atema SOP tasen yakta metetdaksütsü. (Guwahati, June 25)

## TTAADC-i Jhumia kibong 5983 shia nem Rs 3000 agütsütsü

**Agartala, June 25, 2021 (Agencies):** Tripura Tribal Area Autonomous District Council (TTAADC) kübok aliba Jhumia kibong 5983 nem Rs 3000 agütsütsü lemtetogo.

"Council tesemtem nung alir Jhumia kibongtem nem senotsü teyari agütsütsü sentong lir," ta TTAADC indang Deputy chief executive member, Animesh Debbarma-ia ashi.

Jhumia kibong 5983 shia nem Rs 3000 agütsütsü aser iba ya arem merükba, metsü prokba aser alu ayimtsü dak sendakba nung agütsütsü, ta TTAADC ketdangsurtemi sentong renemogo.

Tripura sorkar indang Tribal Welfare department-i senotsü agütsütsü atema osang sangoktsüogogo ta TTAADC Deputy CEM-isa ashi.

Council-i police shimoktsü atema sentong renemer, ta TTAADC nung Chief Executive Member (CEM) Purna Chandra Jamatia-ia ashi.

District council tashi itsütsü atema Centre sorkar dangi onük 15 jungnüa benogo, ta paisa metetdaksütsü. Tripura sorkari financial year 2020-21 atema budget nung TTAADC nem Rs 577.23 crore lemezükja lir.

## Arunachal CM Khandu anema FIR benok



**Itanagar, June 25, 2021 (Agencies):** Arunachal Pradesh kübok Kimin jila Assam nung ta sayuba atema All Arunachal Pradesh Abo Tani Student's Union-i Chief Minister Pema Khandu anema FIR ka benokogo.

"CM Khandu-i Arunachalee nung ali temeten agentsü atema Border Roads Organisation (BRO) aser defence minister Rajnath Singh

den yaritep" ta AAPATSU president Langpu Apon Maru-i FIR nung ashi.

Kimin-Potin lenmang lapoktsü anogo asem lia June 14, 2021 nü CM Khandu-i Project Arunank Chief Engineer, Brigadier AS Chonker den ajurutepa liasü, ta parnokisa ashi.

Kimin ya Itanagar nungi kilometre 75 shi pilar lir aser Arunachal Pradesh kübok

Papum Pare district nung jila ka lir. Ajisüaka, June 17 nü Defence Minister-i gari lenmang mapatong 12 sayatsüdüng BRO-i iba jila ya Assam nung Bilgarh ta sayua liasü.

"BRO chief engineer-i Chief Minister jaoka mapatong sayatsüba indang osang metetdaksütsü. CM-i

Arunachal indang Kimin-Potin indang ali Assam ket nung agütsütsü atema tasa atongba nung shilem agi" ta AAPATSU-isa FIR nung metetdaksüogogo.

Chief minister anema benokba ken o ya okadak tajung ka nung angadangtsüla aser pai nübertem ashiooktsüba kuli metetsüla, ta parnokisa ashi.

[8:05 PM, 6/25/2021] Among TYO App: Arunachal CM Khandu anema FIR benok China-i Arunachal anasa electrified bullet train sayaogo.

## Jaintia Students' Union-i COVID-19 tendangba magizüker

**Shillong, June 25, 2021 (Agencies):** State Health Department-i PHCs/CHCs aser Private Clinics nung shiranger ajak dak Rapid Antigen Test (RAT) ajanga COVID-19 tendangtsü tuyuba magizüker ta Meghalaya nung Jaintia Students' Union (JSU)-i metetdaksüogogo.

Health centre nung nisung ajak dak COVID-19 tendangba ajanga shirangertem temang anepalui maotsü akok ta JSU-i Meghalaya Health Minister AL Hek dangi shidi ka zülu.

"Iba jagi onoki iba tetuyuba

magizüker aser tarutsü nung tetsükdaksü majurutsü atema sorkar dang iba telemtetba meyipa repringshitsü mepishir" ta JSU-i ashi.

Nija clinic tem nung COVID tendangba ajanga shirangertemi sen talila endoktsü, ta parnokisa ashi.

"Shiranger ajak dak mesüi, sorkar aser nija mozü kitem nung COVID-19 agi shirangba yimya aketer dak dang tendangtsüla ta onoki sorkar ayongzüker. Talisa, COVID tendangba ya angati dang asütsüla" ta JSU-isa metetdaksüogogo.

## APSC ken o: Rakesh Paul anema ken o benoktsü tuyur

**Guwahati, June 25, 2021 (Agencies):** Assam Public Service Commission (APSC) nung taoba chairman aser sen yong mapa agütsüba atema tongti tai tonglokja alisang Rakesh Paul anema ken o benoktsü tetuyuba agütsüogogo.

Special Court kati Indian Penal Code (IPC) nung Arlla 420 aser Prevention of Corruption Act nung arlla 13(2) kübok Paul anema ken o benoktsü tuyu. Special Judge Dipak Thakuria-ia iba tetuyuba ya agütsü.

Assam Police indang CID-i FIR benokba nung ajemdaker Rakesh Paul anema ken o benoktsü.

Criminal Investigation

Department (CID)-i 2016 küm Rakesh Paul anema ken o benoka liasü.


Shon Kumar Baishya ta ser nisung kati FIR agütsüba nung taoba APSC chairman Paul-i 2014 küm civil service candidates shimtsü atema süpokrem sen aika agi ta shia liasü.

Rakesh Paul-i mapa ka atema Rs 10 lakh meshi ta Baishya-isa tai tongloktsü.

Rakesh Paul ya 2013 küm APSC chairman inyakttsü shima liasü. Iba sülen 2016 nung pa Dibrugarh Police-i apu.

2016 küm nungi civil service officers aser police officers dena nisung 70 tema puogo.

## China-i Arunachal anasa electrified bullet train sayaogo



**Guwahati, June 25, 2021 (Agencies):** Hokolbarnü China-i Tibet nung mezüngbuba electrified bullet train sayaogo. Iba ajanga Tibet yimtiba Lhasa aser Nyingchi tsüngda sendakteper.

Tibet nung Nyingchi jila ya Arunachal Pradesh den arrtsü anasa dang lir.

China-i India den arrtsü mangatettep ken o adoka lir aser tanü Sichuan-Tibet Railway kübok 435.5-km Lhasa-Nyingchi section lapokogo. July 1 nü Communist Party of China (CPC) küm noklang ka ajungba benjung matongdang iba ya lapok.

Hokolbar anepdang Tibet Autonomous Region nung mezüngbuba electrified railway ya sayaa liasü.

Qinghai-Tibet Railway sülen

Sichuan-Tibet Railway ya Tibet nung railway tanabuba asütsü.

Yaküm November ita China President Xi Jinping-i Tibet nung Sichuan-Nyingchi railway project tekaratiba nung yanglutsü atema tetuyuba agüja liasü.

Iba rail line tasen ajanga arrtsü kümzüka ayuba maparen nung tongtipang shilem agitetsü, ta pai ashi.

Nyingchi ya Medog nung prefecture-level city ka lir aser iba ya Arunachal Pradesh arrtsü anasa lir.

China-i Arunachal Pradesh ya South Tibet kübok shilem ka ta züngshir saka ibaji India-i magizüker.

India-China arrtsü mangatettep ken o ya Line of Actual Control (LAC) nung kilometre 3,488 shi atema lir.



# TIR YIMYIM YIMOBILEM (EDITORIAL)

DIMAPUR

KÜPTOKNÜ

AAMI (JUNE) 26, 2021

## Taküm ya tzü

Asen lima nung balaka, tesem aika nung tzü ya angati talubosa angur, iba jagi asenoki tzü jenjang (value) memetetter. Ajisüaka, alima nung alirtem dang masü saka alima ya dena tzü agi dang longbanger lir, anungji asenok ya tzü agi taküm alir masü saka taküm ya tzü lir ta angatet nungang asenoki tzü jenjangji angatetsü sudi. Aji oda, asenok ama tzüim nungi talangka pilar tenem tekong nung alirtemi tzüim manguba agi junga merajemteter dang ashi, pi tangur aser temeteterteri ashiba asen aliba lima ya noklang nung 71 shilembo tzü dang lir. Tetezü, asenoki alima ya ali tuluba ser kuma lir amai bilemyonga ali aser long shilembo noklang nung shilem 29 (29%) dang lir. Asenoki ibaji auso nung tzü sünga enoker tiyong nung ali telong tilaka yutsü amai bilemdi. Tzü agi alima akümbaji mesüka asenok temang yaa noklang nung shilem 71 bo tzü dang lir, anungji asen temang nung shi, teret aser teküpjibo noklang nung shilem 29 agi dang kuma lir. Aji oda, asen temang shilemtem rongnung tekolok aser temulungjang na yabo noklang nung shilem 73 bo tzü dang aser ano tepokpok yabo 83% bo tzü dang ta ashir. Asenok nisung taküm amaji ali tema nung meyiba süngdonglidongtema tesadang kabo tzü dang lir. Itemji kodang bilemdangdir, asenoki alima nung asenok asoshi ajak dang tekümdangtiba, temeyaktiba aser apayuseta agitsübaji tzü ya lir ta angatetsü. Atangji, alima nung tang tashibo tzü ajema akümba osangbo mali saka alima mopong tatsükba akümba agi tzüim nung tzü terara tali tali mokbanga atuba osangtemang lir. Iba jagi asetkong karbo taruba küm 50 tsüngdabo mokbangadoktsü tsübuba agi, yangji aliba nübortem tanga lima bushia oagi yimti kümteta alitsü lenmang bushitepdagi. Ajisüaka, kodang asenok ama tekong tenem nung alirtem alidak tang ama mapang shitak nung tzünglu marulir, asenokbo maparen aisü nung timtem takoksa ajurur aser tzü maliba agi alu junga meyimet ayawara arutsüa ana nung dang lir. Alima nung tzüim, ayong aser awatsüng nung tzü alibaji balaka saka asenok asoshi tenüngdaktiba tzüji ali tema nungi ali telonglen tatsüka tashi luagi ali den tzü (ground water) alibaji asütsü. Iba nung jagi alu nung tsünusenpongtsütem tzü angutsü aser asenoka tzübo yanglua tzü tateta ajemtsü. Ajisüaka, kodang tzünglu marulir tekong nung aliba alitemji tzü mali kongadoker, anungji tzübo nunga tzü mait roseper aser ayonga tilatema kongadoker. Aji oda, joko taküm kuma mapang shitak nung tzünglu junga maruba agi, aluyimertem alu nung tsük aser metsüjangnutsütem azüngba junga masu aser memeyitet kanga akoksadagi. Atangji, tzüngluji asen ket nung mali, aji Kibuba ket nung dang lir, anungji kodang asenoki tzünglu dak dang nendaker aluyimdir nukaba küm (tzünglu maruba küm) bo alumeyimet endoktsüsa adoktsü. Iba jagi, talisa, tanü putu nung government-i nübortem dang tzünglu tzü tenzüka rizüngtsü atema kidang aser alu nung tzübo yanglutsü atema teyari dena agütsür aser tzü meyaka amshitsü ajungshir. Asenoki Israel nunger aluyimba reprangdangra, parnoka tzü malidak lisem lima nung alu ayimbaji pipe tilala nung tzü mesüa bener arua, tzüji yimdaktsür masü saka süngdong züng shia nung pipe nung jagi tzüjang dang jenoktsüba asenoki angutsü. Tanü asenoka Israel nunger amaji tzü talubosa ayimdak mesüaka alu nung aonsutsü aser süngdonglidong shia tedongzüng nung tzüjang dang jenokja alu ayimtsüba inyakyimji angazüktsüla. Aji oda, akok tashi asenokia ali telonglen tzü alibaji mekongdaktsütsüsa tzü apayua agitsüla aser tzübo aser awatsüng mali kuma ali agi menembangtsüla. Asenoki metettsüba kaji, asen alidak tzübo aser awatsüng nung tzünglu arudang tzü atsüngdenbaji asenok sen bank nung ayu amai lir. Item nungji atsüngdenba tzü jagidang temeket aliba alitem tayi kümdakja süngdonglidongtem mesütsü aser asenok ajemtsü. Aji oda, asenoki tzübo aser awatsüng nungi tzü tateta agi shia aseni ayuba sen bank nungi agizüka agir ama bilema apayua agitsüla.

## OLEMSABANG

### Mapangshia tesayurtem itasen mengui timtemba kuli ngutetogo

S. T. Yapang Lkr. Kohima

India dak alaker alima ajak nung ama tesayur aser sepaitem ya kanga tushia amshir aser itasena tajung agütsür, saka India aser asen Nagalima telungzük nung reprangdangra sepa tilar mapaji onsara tasak, ajisüaka itasen tila, aser Govt. school tesayurji reprangdangra itasen magütsütetba tebilemstü ya aiben ajurua arudaki, iba ya kechiba ta asünung asen Govt. ajanga backdoor talira shimlokba agi ibala timtem ya ajurur ta RTI telangzüba NO.ED/RTI-RPLY/19-20 dated 2nd March 2021 ajanga puteter. Iba RTI telangzüba nung 2010 nungi 2020 tashi Education department kübok 3rd Grade staff 1,803 tashi backdoor ajanga appoint asü ta shia lir, anungji asenoki yangi telemtetba tajung ka agitsü nungdaker, ibaji Education department dang masü department ajak nung iba inyakyimji bentshitsu junger ta bilemer, itasen magütsüteti timtemba mapang shirnok interview ajanga shima lir parnok nemji tama itasen agütsütsü aser promotion-a parnok dang atutsü, iba ya asenoki lemteetsü nungdaker, asenok nübortem ya cabinet-i lemteeta tashi angatsü ata alirtem masü, asenoki aginübajia cabinet-i agizüktsüla. Department ajak office kima pei staff tejangja zülur mataka ayutsü, yangji backdoor ajanga shimertem aser interview ajanga shimer balala lemsar zülua ayutsü asenok nübortem telemtetba ka agidi ta ayongzükter.

Tsünglanglen SDEO balala kübok aser secondary section nung 3rd Grade staff-tem Graduate Teacher, Primary Teacher, Drawing Teacher, Carpentry Instructor, Knitting Instructor, Language teacher amala shimba tejangja nübortem meteta alitsü asoshi lemsateper;

Name of the Division/Section/District	Total No. of Backdoor appointment 2011 to 2020
SDEO Chozoba	36
SDEO Meluri	40
SDEO Pfutsero	43
SDEO Phek	31
Sr. SDEO Kohima & SDEO Chiephobozou	171
Sr. SDEO Dimapur & SDEO Niuland	287
Mon district	138
Sr. SDEO Wokha	64
SDEO Sanis	33
SDEO Bhandari	21
Zunheboto distict	150
Sr. SDEO Tuensang	66
SDEO Longling	72
Sr. SDEO Mokochung	134
SDEO Mangkolemba	72
SDEO Changtongya	43
SDEO Peren	48
SDEO Tseminyu	29
Secondary Section	325
<b>Total</b>	<b>1,803</b>

### - Yimozülur dangi-

June 25,2021 adok Tir Yimyim yimobilem (Editoria) dak sentakba nung nia kakat shisatsü bushiba nung tilaka lemsatepner. Asen lenir-i iba lockdown mapang nung koma kija kibong-i mapa inyaka alitsüla item-ji kanga dang rajema zülogo. Iba editorial nung kaketshirtem, talisa tila tanur school nung azüngertem, shirnok online class dang agidar, pai parnok atema kangasa aroka bilemba indang zülua lir.

Iba den sentakba nung, ni-a tanur school nung azüngertem atema langka lemsatepner. Oda, tanu alima tensa mopung agi ya dang bener arutsüji, asenoki kecha anga meshika aser meinyakteter. Saka, tanurtem küm ana tashi online class dang agia küm temdaktsütsüba yabo kangasa tesasatsü ka lir. Hau amanger, tesayurtem, tsüraburtem aser tanurtem ajak tintim jenti liaka, online class ajanga kakat shisatsü meranga bushia alitsü akok. Saka, schooling ta asüba ya kakat shisatsü bushiba dang masü; iba nung ya, lokti nung koma alitsü, tangar aser pi koma akümtsübuttsüla, koma lokti aser Tsüngrem tenzütsüla; iba amala awashi aser shisatsü angazükba mapang lir. Aser ibala ama shisatsüji school nung tesayur-o-tanur na kilem ka kubok kulemi mener ang tajungtiba angazüteter. Ano, classroom-ji tanur atema training ground tajungtiba, kechiyong iba takdang nung tanurtemi medemertem dang nungia shisatsü aser yimya awashi (tajunga tamajunga) aika angazükter aser iba jagi tanurtem dang tarutsü lenmangji sayur. Kanga tia maka, tanü asen school tanurtem iba maongka, school kidang mener shisatsü angutsü, mangur.

Atangji, online class nung aser classroom nung shisatsü angazükba khen-i dang metemdangtsü makoker. Saka, asenoki kechi ashitsü? Mapangi aji dang bener arunung asenoki tensa den apet adjust asütsüba dang lir.

Anungji, asen shisakar Wb. K Temjen-i tsürabur aser tanurtem dang iba lockdown mapang nung kakat azüngtsü ajungshiba toh kangasa tajungani ta züngogo. Tanü putu melenshiba ama, nuburtem talisa tanurtemi kakat ya kanga sapua mazünger ama ajiteter. Anogo piyong, tanurtem mobile phone, television, computer games mesura online games nungang manpang ajak indoker. Sakasa, nia nenshia dang ashir, kakat dak alaka, shisatsü tenoka angazükdkap sapang aikabo mali. Aser kakat azüngba nungi shisatsü angubaji, Tsüngremi dang taküm aser tekolok shitak toktsüra, iba shisatsü-ji asen den talangka alir. Tesasatsüka, kakat azüngtsüji tsürabur aikati chururtem dang majungshir ama ajiteter aser tanurtemia kakat azüngtsüji kangasa mejangrar ama angur.

Kakat azüngtsü yimya ka ken agi dangbo metemloker aser iba ya practice nungdaker. Aser iba yimya ya, ni bilem nung, tang kakat azüng jangrartem ajak ya, lanuwa mapang temloker alitsü ta amanger, aser iba kakat azüngba yimya ya kangasa addictive, anungji kodang kakat azüngtsü yimya subadir, - talisa tera tantsü tambutem - aika joko kakat mazüngbo meliteter. Ashiko, iba kakat azüngba yimya ajanga asen tantsü tambutemi ashiba o-tem ya kangasa shisa kaa jembiteter aser parnok libaliroa kangasa tesüngjem aser jangratemtsüka taküm liteter akok ako ya.

Atangji, tanü kakat sapua azüngba mapangbo masütsüa akok; koda tesasatsü! Tanü Mokochung town nunga bookstalls aika shibangadokogo. Kar aliba-jia joko newspaper mesura Christian literature mesura academic kaketter-ang angur. Comics, adventure books, mesura children's book-tem yabo kangabo yokya mangur. Saka kakat manguba agi tanurtem kakat azüngtsü majungshir mesüra kakat tajung manguba agi tanurtemi kakat azüngtsü mejangrar ta asünungbo, ajibo kanga tesasatsüka asütsü ta bilemer. Tang yongi tanurtemi kakat azüngtsü mejangrara mesura kakat azüngtsü meshira, parnoki kakat memeimtsü aser parnok shisatsü rajang akümtsü ana nung lir.

Anungji, tang lockdown mapang nung ya, mesura akok nungbo teti asoshi, tsüraburtemi pei tanur dang kakat azüngtsü ajungshia kakat azüngbaji yimya tajung ka kümdaktsüra, koda jangratemtsüka asütsü! Tetenzükdangbo tanurtemi kakat azüngtsüji kangabo mejangratsü akok; saka teti, tsüraburtemi kenü nung khonda ka danga kakat ka azüngtsü mapang lemzüktsür züngdaktüra, tanem-tanemi tanurtemi kakat azüngtsüji jangradoktsü aser parnok shisatsü aser imagination tali dang tuluba akümtsü. Aser tanurtemi kakat azüngtsü jangratsü, kakat jenjang metetsü aser kakat meimtsü. Ashiko, kakettermi tanur ka atema pa/la tembar tajungtiba akümtsüa akok nung koda! Shisakartemi ashir, 'a room without books is like a body without a soul'; anungji, tsürabur kati pei tanur dang yimya tajung rongnung ka sayutsübaji kakat azüngtsüba yimya ka asütsü ta bilemer.

Kanga pelar

~ Longrangty Longchar, Mokochung.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Taoba mapang Khristan school nung nisung 752 aremba leper angu



Canada nung akhidang Khristan school- Marieval Indian Residential School aliba tesem nung Cowessess First Nation-i nisung 752 rema aliba leper ngutetba noksa nung angur.

**June 25, 2021:** Canada nung taoba mapang Khristan school- Marieval Indian Residential School nung tasumang noklang aika aremba nguogo aser Cowessess First Nation-i leper shia nungji leper long kaka azungtsütsü, ta Cowessess First Nation Chief Cadmus Delorme-i metetdaksü.

June 24 nü osangbenertem senden nung jembidang Delorme-i, "Onoki leper shia nungji long kaka azungtsütsü," ta metetdaksü.

Tawa Kamloops, British Columbia nunga Khristan residential school ka nung tanur 215 tasumang aremba jangjaba sülen maneni Canada nungsa Catholic residential school ka nung nisung 752 aremba osang jangjar.

Delorme-i, tasumang ajungaji iba school nung azünger tanurtem tasumang asü masüar mejangja, ta metetdaksü.

"Yangi leper lir ta onoki mezüng yongi meteta liasü, kechiyong akhidang nungi tsüraburtemi yamaji jembia aru," ta pai ashi.

Marieval school ya Regina, Saskatchewan nungi mile 85 shi pilar lir aser iba school ya 1898 küm lapoka liasü. Iba school ya Catholic missionary temi ketdangsüa reprang aser 1968 küm tashi federal sorkari senotsü agi yaria liasü. Tesüsa sorkari iba school repranga aruba sülen 1987 küm Cowessess First Nation nem agütsü.

Iba school ya 1997 küm shibang aser 1999 küm school ki bendoka liasü.

Regina nung tongti putir, Donald Bolen-i sangdong ka ajanga Delorme aser Cowessess nation züngsemtem dang, "Tang nenoki tejashi ajangshibaji ni metetdar. Iba osang angashia onok aoksar," ta lemsatop.

Putirisa, "Leper ngutetba ajanga Indian Residential School inyakyim majungba

aser timtem kanga ajangshiba jangjar. Cowessess nung Marieval Residential School ajanga nisung aika melungjang yiruogo," ta metetdaksü.

"Akhidang khuret tulu ajangshibaji tang tashi asenok den lir, aser tesüiba mapang atalokbatemji jungkai adoktsüla, kechiyong ochi ajangadang tai tokteper yimjung yanglutsü. Nenoki tasü itta ochi bushiba arema pelar," ta putiri metetdaksü.

Putir Bolen-i, "Taoba mapang nunga ni tatok meshia liasü, ajisüaka ano maneni ni tatok meshir aser asürtem indang osangtsüsang bendenba nung ni yaritsü nangzüker. Nenoki kechi mepishidir ni agizüktsü," ta metetdaksü.

Osangbenertem senden nung Delorme-i, tesüiba mapang lepertem nungji temaitsü agüja liasü saka 1960 küm Catholic Arogo nungi züngsemtemi leper lung agien, ta metetdaksü.

"Onoki leper long meindok, ibaji linük ozüng alema lir. Leper shia nungji tenüng zülua toktsüba ajanga onoki temelung yirua alirtem nem taneptsü agütsütettsü," ta Delorme-i ashi.

2019 küm Regina nung Catholic Arogoi maitsü mejangjaba lepertem jangjaba nung yaritsü, leper meküta atsü atsütsü aser süngdong atemtsü atema sen dollar 70,000 agütsütsü melunga liasü.

Osangbenertem senden nungji Federation of Sovereign Indigenous Nations tongti, Bobby Cameron-i, "Kamloops aser Marieval nung lepertem angubaji ajanga ano leper aika alitsü ta jangjar. Item otsüji jungkai adoktsü. Tai tokteptsü atema Canada-i onok den yariteptsüla. Ozü nüburtemi tatok meshiba dang masü saka temeim-a sayudaktsüner. Onoki ochi temeden angutsü temsüa lir," ta metetdaksü.

Iba tatalokba atema Pope-i tatok meshitsüla, sabang ka nungi tatok meshitsüla, ta shia Cameron-i sorkar dang parnok den yariteptsü aser residential school ajak indang records metetdaksütsü mepishi.

Tongti putir, Bolen-i Cowessess nung leper aliba tesem semdangogo aser onok taginüba ataloktsütsü ta shiogo, ta Delorme-i metetdaksü.

June 10, 2021 nü Canadian Conference of Catholic Bishops-i, First Nations, Inuit aser Métis communities nungi taintem/knowledge keepers, residential school nung tamalen azüngertem aser linük tesem balala nungi lanurtem densema telok kati Vatican semdangtsü atema sentong renemdar; yaküm semdangtsü sentong liasü saka coronavirus wara aliba agi mapang atsülanga liasü, ta metetdaksüogo.

Tongti putir, Bolen-i, onoki ashiba ajakji Pope Francis-i angadangtsü nüngdak aser pa den Arogo dang nungi onoki nüngdakbaji pai angadangtsü nüngdak, ta ashi.

Tawa Tk'emlups te Secwepemc Nation-i sangdong ka ajanga, taoba mapang Kamloops Indian Residential School aliba tesem nung küm aika jakdang tanur 215 tasumang rema aliba tawa ngutetogo, ta metetdakja liasü.

Residential School ya 1890 nungi 1969 tsüngda lapok. Iba mapang nungji federal sorkari Catholic Arogo dang nungi iba school meshizüka ketdangsüba sülen 1978 küm shibanga liasü.

Aso 19buba mapang nungi tenzüka 1970s tashi nung Canada nung First Nations tanur 150,000 shi kangshia linüki yariba Khristan school tem nung züngdaktsü. Iba mapang nungji school tem nung tanurtem dak tim mesüi benshiba tatalokba aika liasü.

## ANOGO ABEN TSÜNGREM DEN

### Atetta atsüngba O

*Kechiaser Tsüngrem O taküm, aser teinyak aser anatsü nok ajak dang nungi techiraba; aser taküm o tanela tatentep aser tenüngla ya ajak ateta tsüng bendangtetba aser temulung tebilemba aser tasa asaba yakta metetba. Ibri 4:12*

Oset ana teti tatem makai alitsü: Tsüngrem O aser nübur tanela. Teyangluba nübu shia tesem ka nung tatem maka mapang intoktsü, kotak nung teti tatem maka Tsüngrem den, mesüra Tsüngrem den pilar teti tatem maka molumi nung. Yamaji Tsüngrem O teti tatem makai alitsü, "Ayi akongtsü, nara azülatsü, saka Tsüngrem O teti alitsü" (Isaia 40:8). Yisu Khrista (Tsüngrem Chir) Oji lir (Yn: 1:1, 14), aser Pa yashi, tanü aser teti kasa dang lir (Ibri 13:8).

Asenoki taküm Tsüngrem O bushidang iba yagi asenoki tai inyakba putetdaksür aser asenoki tia ajak ajangtettsüsa renemtsür. Tsüngrem Oi asenok taküm nung taroktiba tashi aitsü akoker. Kechi agi asen taküm aser tanela mesüra teloktep shia aser tenüngla tashi ateta atsüngtsü akok? Tsüngremer Oi atsüngtsü akok. Saka Tsüngremer Oi tarokba aitsü akok. Iba kaket yagi tebilemba aser temulung shisatetba ajak bendangtsü akok. Kodang asenoki tangari au ta asütsüsa langka tajung inyakdir, aser shingai asen tebilemba memetet ta asenoki bilemer, Tsüngremeri metet. Kodang asenoki Khrista nükjitung sayua langka tajung inyakdir, Tsüngrem Oi ibaji jungkai adoktsür. Khrista asoshi nai ne taküm lenir asü? Ibaji inyaktsü asoshi tajungtiba lemangji Tsüngremer O ne taküm nung taküm O ama lidakja aser mapa inyakdaksübaji tajungtiba lemang lir. Ibai zügang! Bushiang! Ibai tashi angang! Iba nung shisadangang! Idangji na azükarutsü aser takok angutsü (Yohan 1:8).

Kibuba, tanü ni Ne O kümdanga kü mulung nung rizüngjang. Amen.

## Khristan lenirtemi 'Religious Freedom Week' amongtsü ajungshir

**United States, June 25** International Christian (Agencies): Khristan lenirtemi Concern nung Advocacy Khristantem dang June 22 nungi Director, Matias Perttula-i, tenzüka June 29 nü tashi "Cardinal Dolan densema "Religious Freedom Week" Khristan lenirtemi Religious amongtsü mepishiogo, ta Freedom week pusema International Christian awareness agütsüba aser Arogo dang Religious Freedom Concern(ICC) osang ajanga pusemstsü ayongzüka atema metetdaksü. ICC-i pelar," ta metetdaksü.

Iba hopta piyong Arogoi religious freedom amokmeren Perttula-isa, "Alima nung iba indang osang balala (religious freedom) ya metetdaksür aser Khristantem meimchirtem atema temeshi dang sarasademtsü ajungshir. temeden ka lir, ajisüaka iba anema amokmeren tuluba

"Religious Freedom Week" hopta piyong anogo shia health-care workers temeden, Iraq akhidang dang nungi tang taliba nunger Khristantem, adoption & ola adoktsüla aser religious foster care aser Equality Act freedom atema jembiba den densema onük balala lemsar külemi reshikangshi tia nung sarasadema arudar. alirtem pusemstsüla," ta ayongzü.

Iba hopta pusema lenirtem aikati tweet südar. Cardinal Timothy Dolan-ia twitter Tang alima nung coronavirus ajanga, "Religious freedom ya wara prokba nokdangtsü atema nisung ajak asoshi lir. Tawa Tenla kitem shibangdaksüba Fratelli Tutti nung Pope Francis- mesüra nisung ishika dang mensüa nisung ishika dang adenshidaksüba mapang nung i sayuba ama iba week pusema religious freedom week temeim mapatem inyaktsüla. amonger. Religious freedom ajanga Taruba ita Washington D.C yimjak nung pei yimsü benshitsü nung religious freedom atema aser meimchir tenzüksü atema inyakertem, lenirtem aser Arogo aser tamangba yimsü organization balala adenshia ajak nem temelaba agütsür," ta International Religious Freedom metetdaksü. Summit nung adentsü.


**OLONG PAITEP # 5856**

	1		2			3		4		5
6								7		
					8		9			
			10							
11										
13		14		15						16
17								18		

- |                              |       |                              |       |
|------------------------------|-------|------------------------------|-------|
| <b>TIPILEN</b>               |       | <b>LANGTSÜNGLEN</b>          |       |
| 1. Inyaker ajangtetba        | - (3) | 1. Meshidak                  | - (3) |
| 3. Bangsemo adokdak          | - (5) | 2. Tanaben soshir            | - (7) |
| 6. Shitak mesüi inyak        | - (7) | 3. Iba anogo                 | - (4) |
| 7. Ya mimong nung angur      | - (3) | 4. Meshi                     | - (3) |
| 9. Reprangzük                | - (4) | 5. Yagi mi tsükloker         | - (9) |
| 10. Tasola                   | - (5) | 6. Shi tapu ka               | - (9) |
| 11. S _ _ _ _                | - (4) | 8. Yagi ayimer saka ozü masü | - (3) |
| 13. Yagi ajak ashioxtsür     | - (3) | 9. Ajokba shiruru ka         | - (7) |
| 15. Ki aokba oset            | - (7) | 12. Inyaktet                 | - (4) |
| 17. Ak shi nung inokba tasen | - (5) | 14. _ _ _ hi                 | - (3) |
| 18. Ishika                   | - (3) | 16. Akümüli nungi pilar      | - (3) |

**OLONG PAITEP # 5855 TELANGZÜBA**

- |  |                                      |
|--|--------------------------------------|
| <b>TIPILEN :</b>                       | <b>LANGTSÜNGLEN :</b>                |
| 1. Telok, 4. Aluru, 6. Ozüng,          | 1. Tenükjang, 2. Luden, 3. Kioxtsü,  |
| 8. Emk, 9. Kin, 10. Teti, 12. Süir,    | 5. Lenti, 7. Tajangzük, 11. teronem, |
| 13. Jen, 14. Ola, 16. Talak, 17. Mazük | 12. Sempa, 13. Jahaz.                |



**TANÜBO NAI LANGZÜANG**

Q. World Competitiveness Index nung India koba jenjang tongteta lir ?  
 A. 40th      B. 43rd      C. 15th      D. 25th  
 \_\_\_\_\_ (Taruba adok nung onoki langzüksü)  
**YASHI ADOK TELANGZÜBA : China**

**AO OSHI ANGAZÜKDAK:**  
**TANÜ ANGAZÜKTSÜBA OJANG**

**Kashi**  
 (n) Pur medemer dang ajaba ( term for a friend)  
 \* Kü temba küna kashi ta jateper.

**Kati**  
 (v) Nisung ana tsüngda yimjung o jembiba (bilateral peace talk)  
 \* Yimtak tongti puri Assam chuba den o kati.



Tir Yimyim

**NAI-A YA METETTER MA?**

- JUNE 26 NÜ ASOR TONGTIBANG NISUNG KAR:**
- British physicist/inventor William Thomson Kelvin (1824)
  - Nobel literature laureate Pearl Buck (1892)
  - German aircraft designer Willy Messerschmitt (1898)
  - William Lear, developer of the Lear jet - (1902)
  - Actor Peter Lorre (1904)
  - Champion athlete Mildred "Babe" Didrikson Zaharias (1911)
  - Musician Mick Jones (1955)
  - Musician Chris Isaak (1956)
  - Actor Chris O'Donnell (1970)
  - Actor Sean Hayes (1970)
  - Actor Nick Offerman (1970)
  - Singer Gretchen Wilson (1973)
  - Singer Ariana Grande (1993)
  - Actor Harley Quinn Smith (1999)
  - Actor Arjun Kapoor (1985)
  - Actor Kunal Kapoor (1959)
  - Indian writer, poet and journalist, Bankim Chandra Chatterjee (1838)
  - Indian hockey player, Manpreet Singh (1992)

**SUDOKU # 5897      TELANGZÜBA # 5896**

		1		2		9			3	1	7	6	2	4	8	5	9	
		6	8		5	3			2	4	6	5	8	9	7	3	1	
					3			8	5	9	8	7	3	1	2	4	6	
				5		3	2		9	2	5	4	1	7	3	6	8	
4							5		8	7	4	3	6	2	9	1	5	
6		8		4	2				1	6	3	9	5	8	4	7	2	
2	3					5	9		6	5	9	8	4	3	1	2	7	
						2			7	3	2	1	9	6	5	8	4	
						1	4	8		4	8	1	2	7	5	6	9	3

**OJANG LUTEP # 5441**

- KIAT :
- HEKN :
- KKOIL :
- ONA :
- IAKT :
- KNHE :
- LKIOK :
- TA :
- EEELNTMPA :
- AOKK :

**OJANG LUTEP TELANGZÜBA # 5440**

**ALIMA NUNG TAKÜM KAJI SAYÜTSÜNGI AGI  
 DANGBO MALIR LIALIA LITETER**

**TAN HOPTA ATEMA - KOMA SÜLA ?**

Q. Food & Civil Supply department nungi Relief jang ya magütsü anen nunga koma süla ?

### Tanü Central trade union 10-i aluyimertem pusema longkak aittsü



June 25, 2021 nü Meerut nung BKU lenir, Naresh Tikait leniba nung aluyimertem tractor nung mener aluyimba ozüing tasen asem anema longkak aittsü atema Delhi-Ghazipur arrtsüi aoba noksa nung angur.

**New Delhi, Aami/June 25 (Agencies):** Tang India linük nung aluyimertemi aluyimba ozüing tasen asem anema longkak aitba pusema Honibarnü central trade unions (CTUs) 10-i anogo piyong longkak aittsü lemtetogo.

Central trade unions-i aluyimertemi akhangba pusemer iba denji külemi parnokki Centre sorkar dang labour codes melentsü aser sensakertem atema income transfer scheme yanglushitsü takhangba agütsür.

Longkak aitba sentong nung All India Trade Union Congress (AITUC), Centre for Indian Trade Unions (CITU), Indian National Trade Union Congress (INTUC) aser Hind Mazdoor Sabha (HMS) densema trade union 10-i shilem agitsü.

Külem sangdong ka ajanga central trade unions 10-i,

parnokki maneni mapa tajungba, itasen tajungba, mapa inyakba tesem tajungba atema takhangba agüja longkak aittsü aser aluyimba ozüing tasen asemprong agienang ta akhangtsü, ta metetdaksü.

Trade unions nungi züngsentemi state balala nung aliba Raj Bhavans kima mener longkak aittsü aser tangüingba district tem nunga longkak aittsü.

Central Trade Unions 10-i akhangba tongti onüktemji-labour codes pezü agientsü, aluyimba ozüing tasen asem den Electricity (Amendment) Ordinance, 2021 agientsü, sensakertem atema income transfer scheme yanglushitsü, mapang telatet ka nung nisung ajak nem vaccine angati agütsütsü, ASHA, Anganwadi employees, sanitation workers densema healthworkers shirnok coronavirus agi südir parnok

kibongtem nem insurance sen million 5 agütsütsü aser nija nem PSUs magütsütsü densema lir.

Aluyimertemi longkak ait tenzüker ita tenet abensaba anogo nung Samyukt Kisan Morcha (SKM)-i linük Tir, Ram Nath Kovind dang aluyimba aser democracy kümzükba den külemi aluyimba ozüing tasen asem agienang, ta takhangba agütsüogo.

Yaküm November 26 nungi aluyimertemi Delhi arrtsülen longkak ait tenzüker June 26 nü ita tenet abensatsü aser iba anogo nung state balala nungi aluyimertem Delhi arrtsüeni oa longkak aittsü.

Samyukta Kisan Morcha (SKM) leniba nung aluyimertem Singhu, Tikri aser Ghazipur arrtsütem nung adenshir 'Save Agriculture, Save Democracy Day' omen nung ajemdaker longkak aittsü.

### Emergency mapang tammang anogotem kodanga mamatsü: PM Modi

**New Delhi, June 25 (Agencies):** 1975 küm India nung Emergency sangdongba sülen Hokolbarnü küm 46 ajungba anogomong nung Ato kilonser, Narendra Modi-i, item anogo tamajungtem tu kodanga mamatoktetsü, ta shia India nung democracy tashi taitba küm daksütsü aser linük temzüng nung alibatem inyaksü nangzük.

Hokolbarnep Modi-i twitter ajanga, "Congress-i yamai democratic tangatetbatem sendoka liasü. Emergency anema nokdakertem aser Indian democracy kümzükertem onoki kodanga mamatoksü," ta metetdaksü.

"Emergency mapang tanak anogotem kodanga mamatoktetsü. 1975 küm nungi 1977 küm tashi nung linük rejutem asalentong yanglur raksaja liasü. India nung democratic inyakyim tashi aittsü aser asen linük temzüng nung alibatem inyaksü atema asenoki

tenangzükba agidi," ta Ato kilonser ayongzük.

Iba anogomong nung BJP lenir aikati Congress aija liasü.

Union Home Minister, Amit Shah-i, 1975 küm iba anogo nung Congress-i democracy tepset, aser ibaji tashi aginüba agi liasü, ta aittsü.

"Kibong ka anema ola adokba nembangtsütsü atema Emergency benoka liasü, aser iba ya India nung democracy nung tammang mapang ka liasü," ta Shah-i metetdaksü.

BJP Tir, J P Nadda-ia Emergency anema nokdaker lenirtem nem akhüm agüja liasü.

1975 küm taoba mapang Ato kilonser, Indira Gandhi-i ita 21 atema Emergency benok, aser iba mapang nungji nüburtem temeden aika agiena liasü.

Ita 21 tembangba sülen Indira Gandhi-i Emergency agienba sülen Lok Sabha elections ayongzükba agi, aser iba election nungji Congress-i tamakok mejungi ngua liasü.



Bhopal, June 25, 2021: India linük nung 'Emergency' (1975-77) sangdongba sülen küm 46 ajungba anogomong nung Bhopal nung BJP züngsentemi longkak aitba noksa nung angur.

### India nung nisung 48 dak COVID-19 Delta plus variant 48 putetogo

**New Delhi, Aami/June 25 (Agencies):** Hokolbarnü Centre sorkari, linük nung coronavirus indang Delta Plus variant atema kanga kümdangtsüla saka maoksatsüla; tang tashi iba variant menatetpba jenjang bushisüingdangdar, ta metetdaksü.

Tang tashi nung India nung nisung 48 dak Delta Plus variant putetogo aser parnok timbaka Maharashtra, Kerala aser

Madhya Pradesh state tem nungi lir.

Delta Plus variant tasenba ya Delta mesüra B.1.617.2 variant nungi lir, aser iba variant ya mezüing India nung puteta liasü. India nung coronavirus tanaben sashia prokba ya iba variant ajanga lir ta bilemer.

Iba variant dang AY.1 taka ajar aser iba variant ya Europe, America aser Asia nung aliba linük 9 nunga nisung 205 dak

putetogo.

Maharashtra nung nisung aika dak COVID-19 Delta Plus variant putetba aser nisung ka asüba sülen Hokolbarnü Maharashtra sorkari state nung tenokdangba tesashiba benoktsü lemtetogo.

Coronavirus indang Delta aser Delta Plus variants ajanga state nung coronavirus wave tasembuba tenzüksüa akok ta bilemer.

### India nung ano nisung 51,667 dak Covid putet aser 1,329 asü

**New Delhi, June 25 (Agencies):** India nung ano nisung 54,069 dak coronavirus putet aser iba tashidak agi shiranger 1,321 süogo.

Tanü agi anogo 42buba anogo shia iba tashidak putetba dang nungibo shiranger anepba timba. Delta plus variant prokba mapang nung Maharashtra nung ano coronavirus tashidak kanga prok tenzükogogo, aser state sorkari iba tashidak kanga prokba district tem dang wara anema tenokdangbatem kera magientsüla, ta tuyuogo.

Tesüiba ghonda 24 tsüingda India nung coronavirus tashidak agi nisung 1,329 asüba sülen linük nung iba tashidak agi asür ajak agibo 3,93,310 jungogo, ta Hokolbarnep Union Health Ministry data ajanga metetdaksü.

Tang linük nung coronavirus tashidak agi teshirangdakpur 6,12,868 dang kümogo aser ibaji

coronavirus caseload nungi shilem 2.03 dang lir.

Linük nung coronavirus agi shiranger 2,91,28,267 anepogo aser iba tashidak agi shiranger asüba shilem 1.31 kümogo, ta Health Ministry-i metetdaksü.

Tesüiba ghonda 24 tsüingda India nung coronavirus vaccine dose lakh 60.73 agütsüogo aser tang tashi nungbo vaccine dose ajak senteper crore 30.79 agütsüogo.

Tesüiba ghonda 24 tsüingda samples 17,35,781 tendangogo aser tang tashi nungbo samples ajak senteper 39,95,68,448 tendangogo, ta ICMR-i metetdaksü.

India nung yaküm August 7 nü coronavirus case lakh 20 ajung, September 16 nü lakh 50 ajung, December 19 nü crore 1 ajung, taküm May 4 nü crore 2 ajung aser June 23, 2021 nü coronavirus case crore 3 jungogo.



Kolkata, June 25, 2021: Hokolbarnü Kolkata nung tzüinglu sashia aruba sülen yimti lenmang nung tzü metsünga alidak padak senzüba noksa nung angur.

# England nung nisung ka COVID-19 agi anogo 290 shiranger taneptsü angu

**Bristol, Aami/June 25 (Agencies):** Bristol, England nungi nisung ka dak 43 ben COVID-19 positive tendangtetba sülen taneptsü nguogo.

Alima nung COVID-19 cases talangtibaji Dave Smith alitsü. Pa dak leukaemia puteta chemotherapy treatment agiba sülen pa indang immune system tashi mait akum.

Arishi küm 72 tain Dave Smith ya COVID-19 agi anogo 290 shiranga liasü, ta osang ajanga ashi.

"Tain tendangba nungbo negative adoktsü, tain tendangba nungbo negative adoktsü ta ni teti sarasadema liasü. Saka yamaji kodanga matalok. Iba tashidak den raraba mapang tashi ajunga agima," ta pai ashi.

Smith ya driving instructor aser kentener ka lir, aser pa iba tashidak agi shirangdang taoba ita ter nung mozü kidang tenetben munga liasü. Mapang ka pa ghonda pongu tanen makai aket, ta pai ashi.

Tatensa pa US company Regeneron ajanga yangluba anti-viral mozü temeyoktep ka agiba sülen iba tashidak nungi taneptsü ngua liasü.

University of Bristol nung aliba scientist temi Smith temang nung COVID-19 virus yimya aser temang nung jakzüka aoba indang asadanger.

Smith ya 44 ben tendangba mapang pa indang report ya negative adok. Ajisüaka doctor temi ibai aibelenba alitsü akok, ta tamang makateti hopta ka lir tendangshiba nung negative liasü.



Iran indang Supreme Leader Ali Hosseini Khamenei nem par linük nung yangluba COVID-19 mozü agitsüba mapang tangokba noksa ka yangi angur. Mozü yanglutetba ya linük asoshi nüma atangtsü mapang ka lir, ta Khamenei-i Hokulbarnü ashi. Pai United States aser United Kingdom ajanga yangluba COVID-19 mozütem mamshitsü January ita metetdakja liasü. COVIran Barekat mozü ya nisung dak December ita tatemlen nungi tendanga liasü aser tawa tembangba third phase trial nung nisung 24,000 shi iba mozü agia liasü.



Linük tezülen aliba yimtsüng ka semdangba sülen Bhutan chuba, Jigme Khesar Namgyel Wangchuck-i security outpost ka nung chi chiyongba noksa nung angur. Par yimli tila, Bhutan ya COVID-19 tashidak nungi kumzüka ayutsü mechi ita 14 tashi King Jigme Khesar Namgyel Wangchuck ya tetsüng agi, gari aser kor nung mener yimtsüng tezülen tashi oa iba tashidak den raratsü renema aliba meratem asameyanga jajar.

# US-i Afghan nunger meyirijang aika anizüker aotsü

**Washington, Aami/June 25 (Agencies):** September ita tashinung sepai ajunga anizüker arutsü lia America nunger mitkar atema inyaker Afghan nunger nisung meyirijang aika linük nungi anir ainshitsü US sentong lir, ta ketdangsürtemi ashi.

Iba sentong nungya nisung 50,000 shi kinungertem dener danga linüktemi anir aotsü akok.

Küm aika US atema oshi meyiptsüba mapa inyaka arur Afghan nunger ya US sepaitem ainshiba sülen Taliban-i tenük yoktsü tetsüba nung lir.

Afghan nunger 18,000 shi US visa meshia lir, saka iba maparen atsülanga arur.

Parnok ya September ita matongdang danga linüktemi anir aotsü sentong lir, kong parnok indang application ya renemtsütsü.

Brehostibarnü White House nung jembiba mapang, "Asenok yarirtem senzüka metoktsütsü. Asenok yaritsü atema pei takum bendanga agütsürtem ama parnok yangi pelashishia agizüker," ta Tir Joe Biden-i ashi.

Tir Biden ya Washington nung

Afghan Tir Ashraf Ghani den Hokulbarnü ajurutepa senden amentsü lir. Iba senden nung tang Afghanistan tensa aser tarutsü nung mitkartem anizüker aoba sülen US-i koba yimya ka nung yaritsü, ta jembitsü imlar.

Afghanistan nungi item nisungtem anizüker arutsü atema nokdaksang, Republican Congressman Mike McCaul-i osangbener dang ashiba agi, iba sentong nungya Special Immigration Visas (SIVs) meshia alir oshi meyiptsür nisung 9,000 shi den parnok kinungertem dendaktsütsü.

"Iba maparen nungya nisung 50,000 shi alitsü. Mapang shidak nung parnok nem visa magütsütettsü akok," ta pai ashi.

Item nisungtem ya Kuwait, Qatar, United Arab Emirates aser Bahrain linüktemi air aotsü akok aser iba maparen nung tayimtsü aika nüngdaksü, ta ashi.

Afghanistan nungi US sepai yariba nisungtem anizüker arutsü atema sentong kanga junga inuakdar, saka mitkar indang tayimtsü menüngdaksü akok, ta Pentagon odongtar John Kirby-i

ashi. "Onoki ibai süoki ia agir. Item nisungtem aser parnok kibongtem dang sentsüh lir ta meteta lir. Sentong teyangludak lir," ta pai osangbener dang ashi.

"Afghan nunger par lima nungi tayimtsü amshia anizüker aotsü, talitsü ki agütsütsü, temang anepalutsü aser parnok mesütsü atema onoki tang sentong yangluba mapang ka lir," ta Pentagon odongtari ashi.

Afghan nungertem ya Guam asetkong nung anioktsütsü atema Congress nung ola adokba tesashiba akumer. Guam ya Pacific nung US indang asetkong ka lir, kong Vietnam War sülen refugee tem khen anenzüktsü atema amshia liasü.

Afghanistan nung US mitkartem küm 20 aliba sülen September 11 tashinung yutsür aotsü, ta Tir Biden-i April ita sangdong. "America atema talangtiba rara tembangtsü mapang tongogo," ta pai shia liasü.

NATO Afghan mission nung linük balala nungi sepai 9,600 adenshia alidak US sepa tajemba agi 2,500 lir.

# Myanmar rara mechi nisung 230,000 tesem balala nung jenoka lir: UN

**Naypyitaw, Aami/June 25 (Agencies):** Taküm Myanmar nung azüdokshi aser rara mechi nisung 230,000 shi tesem balala nung jenshia lir aser teyari nüngdaka lir, ta United Nations humanitarian agency ajanga ashi.

February ita army tekolakba, Min Aung Hlaing-i anir mitkar tashi amshia election ajanga shimtetba sorkar atsüngdokba sülen linük tesem ajungalen nüburtemi longkak aita arur, civilian disobedience movement tenzük aser tawa civilian army tenteta Myanmar teraksa jenjang ka nung lir.

"Pei ki yutsür tesem balala nung prokshia aliba aser azüdokshi agi kongshiba tesemtem nung alir teyari balala nüngdaka lir, aser item rongnung chiyongtsü aser kidang nüngdakba osettsüset, tejenokdak tesem, healthcare, tzü aser mürekmejuba aser tekolok shisatsü nung teyari densema tabu aika

nüngdaker," ta UN Office for the Coordination of Humanitarian Affairs (OCHA) ajanga Brehostibarnü osang ka nung ashi.

Teyari agütsüba maparen tenzüka lir, saka telok balala tsüngta khatepba, azüdokshi aser tetsüba agi tetsükdaktsü ajurur, ta UN body yagi ashi.

Thailand den arrtsüa aliba Karen state nung nisung 177,000 tashi pei talidak yutsür prokshigo - taoba ita nisung 103,000 - aser People's Defence Forces aser India den arrtsüa aliba Chin State nung army tsüngta raraba mapang nisung 20,000 dak tema displacement area 100 nung jenoka lir.

North tsütsü Kachin aser Shan state tem nungia nisung meyirijang aika jena ogo, kong tamalen amenoka aliba ethnic minority army temi mitkartem den mapang talangka nungi rara arur.

Myanmar nung kin tilatemi

tentetba sepai teloktem rongnung telok tulutiba, Karen National Union (KNU) ajanga sangdong ka nung Myanmar tesem ajungalen civilian takum samaba, azüdokshi tali akumba aser mitkartemi tashi tali amshiba indang süoki ia lemsatep.

"KNU ajanga maneni mitkar den raratsü aser akok tashi nüburtem kumzüka ayutsü," ta sangdong ka nung ashi.

Brehostibarnüa Kachin State, Dawei, Sagaing Region aser Yangon nung mitkar anema longkak aita liasü, kong longkak aitertemi banner amer mitkar anemba temaitsü temeyong asem sayua liasü.

Myanmar indang yimti tulutiba rongnung jenjang tanabuba nung aliba, Mandalay nunga nisung kari mitkar yimsüsüba anema nokdaker busemba sayu, kong sorkar anema tawa tentetba telok ka aser mitkar tsüngta Mongulbarnü khatepa liasü,

asert mitkartemi sorkar atsüngdokba sülen yimti tulu nung khatepba tang mezüngbuba alitsü.

Mitkartemi tashiyim amshia sorkar atsüngdokba sülen Myanmar nung anogoshi amai longkak aita arur. Nüburtemi anema nokdak dang mitkartemi tashiyim amshia azüokba mapang civilian 877 tepsetogo, ta Assistance Association for Political Prisoners (AAPP) ajanga ashi. Iba telok ya ozüng alema tentetba telok ka lir, ta mitkar yimsüsürtemi sangdonga lir.

Iba mepetmesü ya tatem kati arua jembishinü tenzüktsü atema züngsem ter aliba Association of Southeast Asian Nations (ASEAN) ajanga merangba nunga terenlokba mali aser mitkar lenirtemi par sentong nung nokdaksü aser küm ana tsüngta election agitsü, ta ashir.

ASEAN densema East Asian Summit indang

ketdangsürtem Brehostibarnü senden ka amenba mapang United States-i parnok dang ASEAN ajanga lemtetba onük pongu nung mitkartemi ai-aora kadaktsütsü asoshi tekeraba nung mera agiang, ta ashi.

Bureau of East Asian and Pacific Affairs indang Senior Bureau Official, Kin Moy-ia Burma mitkari azüdokshiba anendaktsütsü, kuli tejangja makai pua aliba chioiktsü aser democracy lenmangi Burma anitsü atema lungjemer nokdaksü ayongzüka liasü.

Taoba hopta UN pangzüng ka nung mitkar tashi amshia sorkar atsüngdokba aitsü aser yimjung nung longkak aiter anema mitkartemi azüdokshiba tangsa anentsü takangba agüja liasü.

Ajisüaka Myanmar mitkar nem alima ajungai nok-o-nü agütsüba anentsü atemabo UN General Assembly nung pangzüng meyanglutet anendaka lir.

REMEMBERING OUR  
DEAREST MOTHER  
ON HER 1ST DEATH ANNIVERSARY  
**LT. CHUJANGLA**  
MAY 22<sup>ND</sup> 1928 - JUNE 26<sup>TH</sup> 2020



SADLY MISSED ALONG LIFE'S WAY,  
QUIETLY REMEMBERED EVERYDAY.  
THE CONSTANT PRAYERS  
AND LOVE AND AFFECTION THAT YOU LEFT BEHIND  
SHALL ALWAYS REMAIN IN OUR HEARTS.  
YOUR PLACE IS IN HEAVEN.

WE LOVE YOU AYAO.  
LOVED ONES

## DIMAPUR MISSION HR. SEC. SCHOOL

Churches Colony, Near City Tower. Dimapur – 797112, Nagaland.

Email: dmhssdim@gmail.com

Website: www.dimapurmissionhrsecschool.com

### ADMISSION NOTICE

Admission forms & prospectus for class 11 (Arts) both boys and girls available at the school office on all working days (9:00 AM to 1:00PM).

#### Special Features:-

- ❖ Special remedial classes.
- ❖ Spiritual retreat and counseling
- ❖ Hostel facilities.
- ❖ Transportation and generator facilities.
- ❖ Well qualified and experienced subject teachers.
- ❖ Excellent record in class 10 & 12 Board Examination result.

## Phusachodu yimtsüng nung campaign ka ayongzük



Pfutsero, Aami/June 25, 2021: Phusachodu yimdak Covid-19 dak sendakba nung campaign ka ayonga agiba mapang tangokba noksa ka yangi angur.

**Pfutsero, Aami/June 25, 2021 (TYO):** Bodhbarnü (23.06.2021), Phek kübok Phusachodu yimtsüng nung, Pfutsero Sub-Division, Chotisuh Sazo matsüngdang, Public education campaign aser tasümg anepalutsü training, PPE amshiba yimyatem aser lockdown meratem dak sendakba nung ajemdaker sentong ayonga agiogo, ta sangdong ajanga metetdaksü. Iba campaign nung, ADC Pfutsero-i anir, SMO aser MO CHC Pfutsero na dena liasü. Pfutsero Sub-Division, Pfutseromi, Phusachodu, Leshami, Lewoza, Zuketsa, Zapami, Lasumi, Chizami, Sakraba Town, Gidemi, Pholami, Porba, Upper Khomi, Middle Khomi aser Lower Khomi kübok yimtsüng aser jila ajak nung Block Task Force, Pfutsero ajanga health care workers, VDAs aser yimtsüng nung tekolakpur tem atema Public Education Campaign on COVID-19, vaccination aser hands-on-training on dead body management, PPE amshiba yimyatem den lockdown meratem aser Covid-19 dak sendakba inyakyimtem nung ayimjema sentong takok ngua achaayangogo. Iba tour ayonga agiba mapang, yimtsüng ajak nung

## Peren DC ajanga metetdaksür

**Peren, Aami/June 25, 2021**

(TYO): Peren District nung Covid-19 tashidak puteter timba küma aoba asadangteta aser iba wara prokba aziüoktsü asoshi nüngdakba meratem agitsü atema, teküboklen agüja aliba züngsemtem den Hombar (28.06.2021) anügdang 12:00 ako meta Deputy Commissioner indang Conference Hall nung senden amentsü, ta Deputy Commissioner Peren, Sentiwapang Aier-i sangdong ka ajanga metetdaksü.

1. All District Task Force members
2. All District Covid vaccination committee

members

3. KUKI Inphi, Peren
4. Zeliangrong Students Union, Nagaland
5. Zeme Baptist Church Council
6. Liangmai Baptist Church Council
7. ZMO

Anüngji, iba senden nung züngsem ajak medema aruagi adentsü asoshi mepishir. Iba den bendenloksema, SOPs meratem nung anidaksü asoshi, tekalen agüja aliba tentet shia nungi züngsem ka ka dang iba senden nung aruagi adentsü mepishir, ta DC-isa metetdaksü.

## DTF Kiphire-i vaccination drive ayongzüksü

**Kiphire, Aami/June 25, 2021**

(TYO): District Task Force, Kiphire on Covid-19-i Hombar (28.06.2021) anepdang 10:00 ako nungi nikongdang 1:00 ako tashi Zisaji Presidency Government College, Kiphire nung Covid-19 Vaccination Drive ayongzüksü telemetba agiogo, ta sangdong ajanga metetdaksü.

Anüngji, tajangzük

angutsüpur arishi küm 18 nungi 44 tashi aser arishi küm 45 nungi temapur tem vaccine agiba tesem nung ID tejangja bener register süa iba maongka tajung agitsü asoshi sensopur dang mepishir.

Technical teyari atema, District Control Room indang ph no.9612751731 aser 6909374675 nung tongteprateptsü akok.

## Sapotimi yimtsüng nung temsüa alir ajak nem vaccine agütsüogo

**Zunheboto, Aami/June 25, 2021 (TYO):**

Zunheboto district indang Suruhuto Block kübok Sapotimi yimtsüng nung temsüa alir ajak nem Covid-19 vaccine agüja, vaccine ayimjema agütsüba yimtsüng rongnung tanabuba kümogo, ta sangdong ka ajanga metetdaksü.

Sapotimi yimtsüng nung 13/04/2021 anogo mezüng COVID-19 vaccination drive

tenzük, kong temsüa alir nisung 71 nem vaccine agütsü. Ano, 6/06/2021 anogo iba yimtsüng nung tanabuba Vaccination drive agia liasü aser nisung 99 nem vaccine agütsü.

Ajisüaka, 23/06/2021 anogo, iba yimtsüng nung GB's aser tantsü-tambu temi temulungtetba tulu nung temsüa alir ajak nem vaccine agütsü mepishia liasü.

Iba dak sendakba nung, MO Suruhuto PHC, Dr. Abolu Yeptho-i anir medical staff temi Bodhbarnü (23/06/2021) iba yimtsüng semdang aser Sapotimi Village Council Chairman aser GB's matsüngdang temsüa alir nungi tanüngba züngsem 17 nem vaccine agüja liasü. Iba yimtsüng nung temsüa alir züngsem 187 nem vaccine agütsüjemogo, ta kasa sangdong nung shia lir.

## Aboi Town nung timtemer nem teyari agütsü

**Aboi, Aami/June 25, 2021**

(TYO): Aboi Sub-division kübok Covid-19 Lockdown ajanga kongshir alir kibong aser kija nem nüngdakba osettsüset dena aliba relief package tem lema agütsü asoshi, Hokolbarnü (25.06.2021) ADC Office, Aboi nung maparen tenzükogo.

EAC Longching, Cthitu Nienu-i item relief package agütsü aser District Disaster Management Authority ajanga item relief package achaayanga anepalutsüogo, ta sangdong ka ajanga metetdaksü.

tekolakpurtem nem PPEs aser tejak nembangba mask lema agütsüogo, ta sangdong nung shia lir.

Maneni, kasa sangdong ajanga angazükba agi, ADC, Pfutsero, MO Pfutsero aser MO Zuketsa nungeri anir June 20, 2021 nü Pfutseromi, Lekromi, Zapami aser Leshemi yimtsüng nung Vaccination Drive, Hands-on-Training on Dead Body Management aser PPE amshiba yimyatem den Covid-19 yimya aser Lockdown meratem dak sendakba nung Public Sensitisation Campaign ayonga agiogo.

Iba campaign agiba mapang, sentong nung adenertem nem PPEs aser tejak nembangba mask tem lema agütsü. Item yimtsüng nung yimsüsürtemi iba campaign pelashishia agizük aser tangazükba jenti nguogo, ta sangdong ajanga metetdaksü.

## Archery World Cup: Indian women's recurve team final-i iogo



**Paris, Aami/June 25, 2021**

**(Agencies):** India tetsür recurve archery team, shirnoki Final Qualifier nung Olympic quota mengutet, Hokolbarnü, World Cup Stage 3 asayamung nung parnoki takok ngua final tongtetogo.

Deobarnü, India tsür Deepika Kumari, Ankita Bhakat aser Komalika Bari nungeri rank tekuboklen alir Colombia tetsür team makokba ajanga Olympic team qualification nung adentsü maongka mangu, saka Hokolbarnü, semi final nung parnoki set ka makokba dak alaka, rank trokbuba nung alir France team madak 6-2 agi

takok angu. World Cup Stage 3 ya Olympic qualifying asayamung ka masü.

India tsür asem, shirnoki taküm April ita Guatemala City kübok ayongba World Cup indang mezüing stage takok angu, parnoki Deobarnü Mexico team den final asayatsü. World No. 3 Deepika-i iba final nung gold medal tasembuba atema tokteptsü imlar.

Deepika aser la kinungbo Atanu Das na temeyoktep tarep final tonga lir. Kasa mapang, kija recurve' asaya nunga la semi final-i iogo. Seed tanabuba nung alir India tetsür team, shirnok round tanabuba nung 'bye' angu, quarter final nung 6-0 agi seed

tenetbuba Turkey makokdang, mezüing round nung par teloki seed 15buba nung alir Spain team tsükdaktsü.

Semi final tetoktepba nung, par asemi point 57, 57, 54, 57 ngua France tetsür team - Lisa Barbelin, Audrey Adiceom aser Angeline Cohendet nungeri tsükdaktsü.

Kasa asayamung tebur tetoktepba nung, India nungeri Das, Tarundeep Rai aser Pravin Jadhav, shirnok iba qualification nung jenjang 8buba lir, quarter final nung top seed Germany puri parnok tsükdaktsü.

Tebur quarter final nung, India team pur 2-0 agi tejekdang ser asaya liasü, saka Das, Rai aser Jadhav nungeri point 2 agi round pezübuba takok mangudang, Germany nungeri Moritz Wieser, Maximillian Weckmueller aser Florian Unruh nungeri set tanabuba aser tasembuba koka, parnoki 4-2 agi India tsükdaktsü.

Germany teloki asemen tashi point 9' angu aser India-i 8, 9 aser 9 dang ngua point kati iba asaya makok.

## Eastbourne International: Sania aser Bethanie na tsükogo

**Eastbourne, Aami/June 25, 2021 (Agencies):** Tang tasayadak aliba Eastbourne International asayamung nung, tetsür tarep, Sania Mirza aser la den külem asayar Bethanie Sands naprongla mezüing round nung tamakok anguba sülen iba asayamung nungi tsükogo.

Tetsür tarep asaya mezüing round nung Sania aser Bethanie nati 3-6, 4-6 agi Sabrina Santamaria aser Christina

McHale na makokba sülen, iba asayamung nungi tena tukadok.

Sania aser Bethanie na set ana tashi nung atonga tamakok angu aser taruba round nung tokteptsü asoshi tenati junga masayatet.

Iba asaya mezüing set nung Sania aser Bethanie nati 3-6 agi tamakok angu. Tanabuba set nung tenati point talila ka anguba dak alaka, iba set nunga 4-6 agi Sabrina aser Christina makok.

June 06, 2021 nü, Sania-i Nottingham Open nung mezüing asaya tenzük. Iba sülen, June 14, 2021 nü lai Birmingham Open nunga shilem agiogo. Tesüsa, lai Eastbourne Open nung shilem agi aser iba asayamung nungi la tsükogo.

Tang, Indian tennis star, Sania-i Wimbledon Grand Slam nung shilem agitsü terenemba lir. Iba asayamung June 28, 2021 nungi tenzük asayatsü.

## India Test team-i intra-squad game ana asayatsü

**New Delhi, Aami/June 25, 2021 (Agencies):** England team den Test series asaya pungo atema renemshitsü mechi anogo 15 nung Indian Test team pur Durham nung tanaben adenshitsu. Iba series August 4 nü Nottingham nung tenzüktsü.

Bodhbarnü, Southampton nung World Test Championship final tamakok anguba sülen, mapang tatsüka India team pur London temeküt aser telungtet nung amungtsü. Ano külen, asayar 8 tashi shirnok WTC final atema züingsem 15 squad

nung maden, taoba hopta iba asaya tenzük parnok ajak Southampton toktsür ogo, ta sangdong ajanga metetdaksü.

Iba series dak sendakba nung sentong renemba ama, mezüing Test atema Nottingham-i aotsü hopta ka lia Riverside Ground, Durham nung India team pur intra-squad game ana asayatsü.

"Covid temzüing nung anidaka, iba sentong renema liasü. India team ama County team tem kasa bubble nung mungdaksütsü tasak lir. Iba

wara nungi asayatem kümzüka ayutsü ECB-i kanga kümdanga meratem agir. Durham nung India team bubble yanglutsü," ta BCCI otongdar sangdong ka ajanga metetdaksü.

Maneni, July ita County championships den T20 Vitality Blast aser "The Hundred" indang lapokba asayamung takok ngua ayongzüktsü asoshi ECB-i asalentong balala atongtettsü nungdaker. Kasa mapang, ECB-i külem sendaktepa alir ajak teyari nungdaksü.

## 1918 nungi Naga yimten tebilemstsü.... (Tapak 1 nungi...)

Kongsang kati tera dang ali nung yanga aotsü mesayutetsü" ta WC, NNPGs-isa ashi.

Framework Agreement nung putiotsü aser yimten aibelenbatem "Agreed Position" ajanga metongshiogo. Iba ajanga Working Committee-i asenok kidangertem Meitei, Kuki aser Ahom nungeri den ajuruteptetogo aser NNPGs-i kidangertem den angateteptsü

mapa tenzükogo. WC, NNPGs ya Naga kintem aser civil society tem ajanga tentetba lir aser 1951 plebiscite tangatetba nung Naga nungeri tarutsü atema India sorkar den inyaka aotsü, ta parnokisa ashi.

Iba sangdong nung Convener, WC, NNPGs & Gen. Secy. GPRN/NSCN N. Kitovi Zhimomi, Co-Convener, WC & Kedallo NNC/FGN Zhopra Veru, Co-Convener, WC &

President NSCN (Reformation) Y Wangtin Naga, Co-Convener, WC & Gen. Secy., NNC/ NPGN Z Hozheto Choppy, Co-Convener WC & President, NNC/GDRN

Kiumukam Yimchunger, Co-Convener, WC & Gen. Secy., NNC (Parent Body) Toshi Walling aser Co-Convener, WC & Gen. Secy, NSCN/ GPRN(K) Isak Sumi nungeri sign süa lir.

## Uganda Olympic team züingsem ka dak COVID-19 Delta variant putet

**Tokyo, Aami/June 25, 2021**

**(Agencies):** Ugandan Olympic team nung züingsem ka, shiba Japan tonga aruli coronavirus tashidak putet, iba nisungba dak Delta variant aliba putetogo, ta Hokolbarnü Japan indang Olympic minister-i ashi.

Iba Games tenzüktsü ita ka jungnüa lia, Covid-19 wave tasen ka ajanga timtem adokdaksütsü ama tebilemstsü akar, ta pai shisem.

Taoba Honibar, Japan tonga aruba sülen, Africa linük indang telok nungi coach ka dak coronavirus positive putet. Ano külen, iba team Izumisano tesem tonga aruba sülen, Bodhbarnü züingsem tanabuba - athlete dak Covid-19 puteta liasü, ta ketdangsürtemi ashi.

Osangbener den jembiba mapang, Olympic Minister Tamayo Marukawa-i ashiba agi, Honibar anogo tonga arusang dak Delta variant aliba putetogo. Covid-19 puteta alir nisung tanabuba dak-a tendangdar, ta NHK TV sangdong ajanga metetdaksü.

Marukawa-i ashiba agi, iba dak sendakba nung tanga ministry tem den jembiteptsü aser nungdakba meratem agitsü asoshi parnok den longjemer inyaktü," ta NHK-i ashi.

Japan tesem kecha nunga Covid-19 wara mazioktettsüsa iba tashidak kanga mejungi prokshia aoba mali, saka iba wara - pezübuba wave agi

nüburtem timtemogo.

Tashidak tasen putetba ajema akümba aser Vaccination maparen kara achaayanga agiba ajanga, Tokyo aser tanga tesem 8 nung state of emergency pungbadaksütsü asoshi lenmang adok.

Ajisüaka, takotet temi Tokyo nung iba wara tasenka den külemi kanga kara menashia aoba variant ka adoktsü asadangtetba tebilemstsü lemsatepogo. Brehostibarnü, Tokyo nung nisung 570 dak COVID-19 tashidak tasen puteta liasü, koba taoba hopta kasa anogo putetba (452) dang nungi timba alitsü.

Japan sorkar aser Olympics achaayangertemi, July 23 nungi tenzüktsü aliba Games ya tenokdangba kecha melii aser iba wara nungi shilem agir ajak kümzüka ayongzüktsü nangzüka lir. Ajisüaka, tang ama tensa tamajungdang, Japan nung nübur aikati iba asayamung takok ngua ayongzüktsü asoshi arendaka bilemstsü.

Olympics ayongertemi, iba Games nung bendanglen nungi terepranger marudaksütsü telemtetba agiogo aser Japan nung alir tasüsa asayatem reprangtsü asoshi terepranger atakzükja lir. Ano külen, stadium telung nung yi amshiba, 'high-fives' aser ola tulu adoka jembiba ajak nokdangtsü temzüing renemogo.

## Mallorca final nungi Novak Djokovic tukadok

**Madrid, Aami/June 25, 2021**

**(Agencies):** Wimbledon Mallorca tennis asayamung tebur tarep final nung shilem agia liasü. Ajisüaka, Brehostibarnü iba final tasayadak nung Djokovic den külem asayar Spain nungeri Carlos Gomez-Herrera tetsüing yiruba sülen, Mallorca final nungi tukadoktsüsa aküm.

World no.1 Djokovic aser pa tembar Gomez-Herrera nati iba asayamung final tongtettsü atema, semi final nung tenati seed tasembuba Oliver Marach aser Aisam-ul-Haq Qureshi madak 6-3, 7-6 (7/4) takok angu.

Iba asayamung nung Djokovic aser Gomez na longjemer mezüing shilem agi final tongteta liasü. Ajisüaka, Gomez tetsüing yiruba ajanga tenaprongla asaya tom nungi tukutsüsa aküm.

"Gomez-Herrera tetsüing nung timtem aliba ajanga Mallorca doubles final nungi Novak Djokovic aser Carlos

Gomez-Herrera na tukadokogo," ta ATP sangdong ka ajanga metetdaksü.

"Iba title atema Simone Bolelli o Maximo Gonzalez aser Marcus Daniell o Philipp Oswald nungeri tokteptsü," ta kasa sangdong nung shia lir.

Taruba hopta nungi tenzük asayatsü aliba Wimbledon asayamung atema, tejangraba tulu nung Djokovic-i iba grass court asayamung (Mallorca) nung shilem agia final tashi tongteta liasü.

"Kunati iba asayamung final tongteta asayatsü imlaa meliasü," ta asaya nungi tukur sülen Djokovic-i ashi.

"Ajisüaka, künapronglai melentepa serve junga yokogo aser liromedema asayaogo," ta pai ashi.

Kasa asayamung, tebur kija tetoktepba nung, top seed Daniil Medvedev-i kanga meranga asaya Norway nungeri Casper Ruud madak 7-5, 6-1 agi takok ngur sülen, semi final tongogo.

## BILEMDANGANG

"Meinyaki bilemba kisung agi dangbo maparen nungeri maotsü."